



UNIVERSITÄTS-
BIBLIOTHEK
PADERBORN

Universitätsbibliothek Paderborn

Occupatio animae Jesu Christo crvcifixo devotae.

Leroy, François

Pragae, 1666

§.1. In natura rerum complura passionis Dominicæ vestigia reperiri.

[urn:nbn:de:hbz:466:1-47123](https://nbn-resolving.org/urn:nbn:de:hbz:466:1-47123)

§. I.

In natura rerum complura passionis Dominica vestigia reperiri.

Multa sunt in natura rerum, quæ passionis Dominicæ speciem & imaginem quandam sensibus intuentium, ingerant, piâsque mentes ad eam recolendam exfuscitare, possint. Ut enim omittam, eorum pleraque quæ in usus nostros ac sensus passim incurrunt crucis in se figuram præferre; uti S. Justinus, Tertullianus, aliique Patres adversus Gentiles disputant; tametsi in usus quotidianos ita veniant, ut absque animi reflexione usurpentur: quædam sunt alia, naturæ dicam miracula, an lusus divinæ Sapientiæ? quæ & raritate & novitate suâ, & insignioribus passionis Dominicæ notis, spectantium animos magis rapiant, & sive in divinæ sapientiæ admiratione, sive in suavi passionis Christi memoria ac contemplatione potentiùs detineant.

Ubi in primis occurrit animo, planta illa supra modum mirabilis, quam Hispani Granadillum vocant, in Peruano regno aliisque circum nonnullis Provincijs nascens; cujus passim figura circumfertur: in cujus nimirum flore, ac fructu, velut exsculpta cernuntur, columna, clavi, corona spinea, & omnis propè Dominicæ passionis apparatus. Ut videri possit illis populis, naturale istud passionum Christi simulacrum, autoris naturæ benignâ quadam atque suavi providentiâ, ad ejus mysterij firmandam fidem alendamque memoriam, singulariter esse concessum.

l. 2. de cruce, cap. 6.

Additque hæc referens Jacobus Bosius; accepisse se à fide dignis, eodem in regno fructum existere, in cujus dissecati medulla, non crucis tantum signum aliquod, sed etiam Crucifixi imago, expressa cernatur.

Sed & memoratu dignum videtur, illud cancerorum genus, quod in Sinico mari inventum est: in quorum dor-

fo purpurascete, videre est insignem & candidis notis pulchre expressam crucem, eamque triumphali specie: quippe crucis stipite, velut è gleba quadam, enascente & decorè surrecto; utrimque autem ad crucis latera vexillis duobus ex ipso crucis pede subnascentibus; quali formâ in signum victoriæ, Christo de morte triumphanti vexillum in manum dari solet à pictoribus nostris. Quam etiam rem attentius inspectam, nobis affirmant qui à Sinis revenère Patres, non exiguum momentum ad quorundam ad Christum conversionem attulisse.

At hoc quod jam dicam, haud equidè scio, naturæ miraculo, an superiori ac divinæ virtuti adscribendum putem: Ad B. Virginis Bivonensis ædem in Sicilia, jam olim oleum scaturire odore cœlesti, eaque insuper proprietate, ut illius guttæ, quocunque tandem modo decendant, non (uti assolent) in orbem se colligant aut diffundant, sed sese semper in crucis figuram diducant: uti etiam haud pridem literis inde missis confirmatum est.

Illud etiam mirabile, in marmoribus dissectis extitisse aliquando, non quædam duntaxat passionis Dominicæ insignia, sed integram etiam Christi crucifixi effigiem, nativis inibi coloribus efformatam: qualem unam aliquam aiunt Venetijs in ædibus S. Georgij monstrari.

Extant denique sæpius in gemmis aliisque lapillis naturaliter, quædam Domini nostri cruciatuum monumenta: cujus rei specimen aliquod profertur in vita B. Aloysij Gonzagæ. Siquidem is etiamnum puer, dum ab Italia in Hispaniam cum matre navigat, inter marinos scopulos lapillum offendit, certis distinctum notis, quæ Christi plagas referre viderentur. Quo ille invento mirè lætus, idque divinitus sibi oblatum interpretans, quò certius intelligeret, vitam sibi Iesu Christo conformem & cruciatuum ejus affinem, esse suscipendam; confestim ad matrem conversus: *En-*

L. 1. Vit.
cap. 17.

Domina (inquit) *quod mihi Deus obtulit: & tamen Pater ad-
huc me verabit Religiosum fieri?* Ita mens bona in succum
suum vertit omnia, & (quæ amantium est indoles) de mini-
mis etiam vestigijs, divinæ super se sapientiæ consilia, &
quasi voces Dei se vocantis, venatur.

In epitom.
c. 8. §. 1.

Addere libet, quod his pridem scriptis legere contigit,
apud religiosum oculatumque testem Joannem Gonzalez
Hispanum ex Ordine S. Augustini: quod nempe juxta Mo-
nasterium S. Catharinæ de Badajia ejusdem Ordinis, in ipso
colle lapilli legantur, perfectam cordis figuram habentes,
impressis notis quinque decussatim implexis, Christi vulne-
rum formam referentibus, & S. Catharinæ rotam exprimen-
tibus: cujusmodi quosdam se quoque ibidem vidisse &
collegisse testatur.

Nonnulla his affinia, aut etiam mirabilia, videri
possunt apud Joannem Nider in Formicario l. 4. c. 6.

§. 2.

*Amantem animam omnibus propemodum in rebus dilecti
passionem agnoscere.*

Verùm ista quoque, ijs quas dixi rebus, inscripta passio-
nis Christi monumenta, etsi magnam per se vim ha-
bent, ad id tamen quod isto capite exequendum suscepi, mi-
nùs faciunt: quippe quæ extra usum communem posita, &
certis duntaxat contenta locis, utilitatem ac fructum non
ita latè patentem habeant.

In primis igitur id adjungimus: Christum Dominum
vehementer amanti, & in ejus amarioribus doloribus commedi-
tandis exercitato, non fore admodum difficile, omnibus
propemodum in rebus passionis ejus argumenta aliqua re-
cognoscere, iisque conspectis revocare animum ad piam
dilecti pro ipsis passi recordationem.